

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 101046 24 K  
Visoko, 16.09.2024.godine

## U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog optuženog S.O. sina Sedina iz Visokog, zbog krivičnog djela nasilje u porodici iz čl.222 st.2 KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0056616 23 od 20.02.2024.godine, na pretresu za izricanje krivično pravne sankcije održanom u prisustvu Kantonalnog tužitelja Husić Adisa i optuženog S.O., dana 16.09.2024.godine, donio je i javno objavio:

## P R E S U D U

**OPTUŽENI: S.O.**, sin S. i majke S. rođene B., rođen ... godine u V., gdje je i nastanjen u mjestu D.T.p. broj ..., pismen, posjeduje SSS, po zanimanju autoelektričar, nezaposlen, oženjen, otac dvoje djece, lošeg imovnog stanja, Bošnjak, državljanin BiH, JMB: ..., osuđivan,

## K r i v j e

što je:

dana 23.12.2023. godine, oko 15,00 sati, u svojoj kući u mjestu D.T.p. broj ..., grad V., nakon prethodne prepirke i svađe sa svojom nevjenčanom suprugom A.H., prišao istoj dok je ona ložila vatru u šporetu a potom je iznenada i neočekivano udario nogom u predjelu stražnjice da bi je zatim uhvatio rukom za kosu i povukao, svjestan da na taj način ugrožava njen mir i tjelesnu cjelovitost, što je i htio, te ovakvim nasiljem ugrozio njen mir i tjelesnu cjelovitost,

čime je učinio krivično djelo Nasilje u porodici iz člana 222 stav 2 KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH,

i z r i č e

## USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 6 (šest) mjeseci, a koja se neće izvršiti ako optuženi za vrijeme od 2 (dvije) godine, od dana pravosnažnosti presude, ne počini novo krivično djelo.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

#### Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0056616 24 od 20.02.2024.godine, optužilo je optuženog S.O. sina S. iz V., zbog krivičnog djela nasilje u porodici iz čl.222 st.2 KZ FBiH,( Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 22.02.2024.godine. Na ročištu o izjašnjenju o krivnji dana 09.07.2024.godine, optuženi je izjavio da je kriv za krivično djelo nasilje u porodici iz čl.222 st.2 KZ FBiH.

Na ročištu o razmatranju izjave o priznanju krivnje dana 16.09.2024.godine, sud se uvjerio da je optuženi izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predložene dokaze i to : zapisnik o saslušanju svjedoka-oštećene A.H. PS Visoko broj: 08-02-09/1-1249/23 od 23.12.2023. godine, zapisnik o saslušanju svjedoka O.H. PS Visoko broj: 08-02-09/1-1251/23 od 23.12.2023. godine, Rješenje Općinskog suda u Visokom broj: 41 0 Pr 100358 23 Zm od 24.12.2023. godine i izvod iz kaznene evidencije za osumnjičenog S.O. PS Visoko broj: 08-02-09/1-interno/23 od 25.12.2023. godine.

Naime, priznanjem optuženog koje je u potpunosti i u skladu sa predloženim dokazima, nesporno je dokazano da je isti počinio krivično djelo koja mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglasio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom S.O. kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćenju krivičnog postupka, iskreno kajanje optuženog, da su odnosi sa vanbračnom suprugom dobri da ne traži štetu i da izdržava porodicu od povremene zarade, dok je na drugoj strani sud od otežavajućih okolnosti cijenio da je optuženi osuđivan ali ne za istovrsno djelo..

Cijeneći utvrđene okolnosti na strani optuženog, sud je optuženom S.O. na osnovu članova: 42., 49. i 62. KZ FBiH, izrekao uslovnu osudu, kojom je optuženom za počinjeno krivično djelo utvrđena kazna zatvora u trajanju od 6 (šest) mjeseci, a koja se neće izvršiti ako optuženi za vrijeme od 2 (dvije) godine od dana pravosnažnosti presude, ne počini novo krivično djelo, u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu člana 202. stav 4. ZKP FBiH, sud je optuženog oslobodio plaćanja troškova krivičnog postupka i isti padaju na teret sredstava suda.

Sudija  
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.